





清刻龍藏佛說法變相圖

新編
乾隆大藏經

七九四

龍藏

陰持入經卷上

上同下

竭四

後漢安息國三藏安世高譯

佛經所行示教誠皆在三部爲合行何等爲三一爲五陰二爲六本三爲從所入五陰爲何等一爲色二爲痛三爲想四爲行五爲識是爲五陰色陰名爲十現色入十現色入爲何等一眼二色三耳四聲五鼻六香七舌八味九身十樂是爲十現色入是名爲色種痛種爲何等痛種爲身六痛一眼知痛二耳知痛三鼻知痛四舌知痛五身知痛六心知痛是爲身六痛名爲痛種思想種爲何等思想種爲身六思想一色想二聲想三香想四味想五更想六法想是爲身六思想名爲思想種行種爲何等行種名爲身六更一色所更二聲所更三香所更四味所更五觸所更六

法所更是爲身六更是名爲行種識種爲何等識種名爲身六識眼識耳識鼻識舌識身識心識是爲身六識是爲識種名爲五陰種當知是從何知爲非常苦空非身從是知亦有二知一爲慧知二爲斷知從慧知爲何等爲非常苦空非身是爲從慧知從斷知爲何等愛欲已斷是爲從斷知陰根足爲何等積爲陰根足爲陰根譬如物種名爲物種木種名爲木種火種名爲火種水種名爲水種一切五陰亦如是有十八本持十八本持爲何等一眼二色三識四耳五聲六識七鼻八香九識十舌十一味十二識十三身十四更十五識十六心十七法十八識是名爲十八本持已知是從何知爲非常苦空非身是爲知從是知亦有二知一爲從慧知二爲從已斷

知從慧知爲何等非常苦空非身是爲從慧知從斷知爲何等愛欲已斷是爲從斷知彼爲具足具足爲何等或言無有餘具足已無有餘令眼明見明一行者說是已爲斷眼本身本遍說如是率名爲本持譬喻人爲多熟耳本遍說如是率名爲本持譬喻人爲多熟如是名遍譬喻是爲具足亦有十二入何等爲十二自身六外有六自身六爲何等眼耳鼻舌身心是爲自身六入外有六爲何等色聲香味更法是爲十二入一切從何知爲非常苦空非身是從是知亦有二知一從慧知二從斷知從慧解知爲何等爲非常苦空非身是爲從斷知從斷知爲何等愛欲已斷是爲從斷知何等爲入解從是致名爲入從入解譬從金入名爲金地從銀入名爲銀地如是各各應是譬喻所從所入是從是有如是

從所意念有行罪苦法如是從所致是名爲從是入亦有從是入譬如王有入所有名是亦如是爲有四諦苦習盡道苦名爲要語身亦念習名爲要癡亦所世間愛盡名爲要慧亦解脫道名爲要止亦觀亦有三十七品經

法四意止四意斷四神足五根五力七覺意賢者八種道行是爲三十七品經法過去佛亦有是現在佛亦有是未來佛亦有是辟支佛亦從是得度世道佛弟子亦從是爲度世無爲道四意止爲何等或見比丘自身身相觀行止外身身相觀行止內外身身相觀行止盡意念以却世間癡心方便自痛痛相觀行止外痛痛相觀行止內外痛痛相觀行止盡意念以却世間癡心方便自意意相觀行止外意意相觀行止內外意意相觀行止盡

意念以却世間癡心方便自法法相觀行止外法法相觀行止內外法法相觀行止盡意念以却世間癡心方便

何等爲從四意正斷或比丘有未生弊惡意法發方便令不生勸意不捨方便行精進攝制意捨散惡意是爲一斷意已生弊惡意發清淨法欲斷勸意求方便行精進攝制意捨散惡意是爲二斷意未生清淨法勸意發方便令生行精進攝制意捨散惡意是爲三斷意已生清淨法令止不忘令不減令行不翹令行足發方便行精進攝制意捨散惡意是爲四意正斷何等爲四神足或有比丘爲欲定斷生死隨行增神足惡生死猗却欲猗從方便意生遣離去是爲一神足精進定斷生死隨行增神足惡生死猗却欲猗盡猗從方

便意生遣離去是爲二神足意定斷生死隨行增神足惡生死猗却欲猗盡猗從方便意生遣離去是爲三神足戒定斷生死隨行增神足惡生死猗却欲猗盡猗從方便意生遣離去是爲四神足四意止四意斷四神足爲已說具何等爲五根信根精進根念根定根慧根是名爲五根彼根應何義根爲根義屬爲根義可喜爲根義不爲同事爲根義是名爲根義何等爲五力信力精進力念力定力慧力是名爲五力彼力應何義無有能得壞爲力義有所益爲力義有膽爲力義能得依爲力義是名爲力義有七覺意何等爲七覺意一念覺意二法分別觀覺意三精進覺意四愛可覺意五猗覺意六定覺意七護覺意是名爲七覺意有得道者八種道行何等爲

八一直見二直行三直語四直業五直利六直方便七直念八直定是名爲八道行八種道行爲墮合三種一戒種二定種三慧種彼所直語直業直利是名爲戒種彼所直方便直念直定是名爲定種彼所直見直行是名爲慧種皆從是教戒令不翹教戒令不翹教意令不翹慧教戒彼戒種比丘爲拔瞋恚惡本爲散瞋恚結爲合恚瘡爲識苦痛爲度欲界彼定種比丘爲拔慳惡本爲散欲結爲合欲瘡爲知樂痛爲度色界彼慧種比丘爲拔癡惡本爲散癡結爲合憍慢瘡爲知不樂不苦痛爲得度無色界是爲三種比丘止爲拔三惡本散三惡使合四瘡知三痛度三界何等爲十二種從求如求等生從癡因緣令有行從行令有識從識令有名字從名字令

有六入從六入令有致從致令有痛痒從痛痒令有愛從愛令有受從受令有有從有令有生從生令有老死憂悲苦不可心致惱如是具足苦種爲致習癡已盡便行盡已行盡便識盡已識盡便名字盡已名字盡便六入盡已六入盡便致盡已致盡便痛痒盡已痛痒盡便愛盡已愛盡便受盡已受盡便有盡已有盡便生盡已生盡便老死盡已老死盡憂悲苦不可心惱便盡如是具足苦種便得盡彼癡名爲不知四諦如有不解不見不相應不受不解不解貌是名爲癡彼癡因緣行爲何等爲六望受何等爲六色聲香味身法是爲身六望受是名爲行彼行因緣識爲六身識眼耳鼻舌身心是名爲六身識彼識因緣名字字爲色名爲四大色陰痛想行識是

爲名色爲四大本謂地水火風是上爲名是四爲色是二相連共爲名字彼名字因緣身六入受眼耳鼻舌身心是名身六入受彼六入因緣身六思望眼耳鼻舌身心是名爲身六思望彼思望因緣身六痛眼耳鼻舌身心是名爲身六痛彼痛因緣六入身愛色愛聲愛香愛味愛身愛法愛是名爲六身愛彼愛因緣受爲四受一欲受二見結受三戒願受四身結行受是名爲四受彼受因緣有爲三有一欲界二色界三無色界是名爲三有彼有因緣生爲上五陰六持六入已有如有生聚已住墮致分別根已入得有是名爲生死爲何等名爲人人所在在所住已住壞已過死是時命六根已閉塞是爲死上本爲老後要爲死是故名爲老死癡相爲何等爲冥中

見寘如有不解令從是致墮行相處行相爲何等爲今後復有是爲行相上從是發起令從是致墮識處識相爲何等爲識物識事是爲識相令從是致墮名字處名字相爲何等爲俱猗是爲名字相令從是致墮六入處六入相爲何等爲分別根是爲六入處令從是致墮思望處思望相爲何等爲相會更生是爲思望相令從是致墮痛處痛相爲何等爲更覺是爲痛相令從是致墮愛處愛相爲何等爲發往是爲愛相令從是致墮受處受相爲何等爲受持是爲受相令從是致墮有處爲相爲何等爲致令墮若干處是爲有相令從是致墮生處生相爲何等爲已有五陰是爲生相令從是致墮老處老相爲何等爲轉熟是爲老相令從是致墮死處死相爲何等

爲命根盡是名爲死相令從是致墮苦處苦相爲何等爲身急是爲苦相令從是致墮不可處不可相爲何等爲心意急是爲不可相令從是致墮悒悒憂悒悒相爲何等爲憂五陰令從是致墮愁惱處悲愁相爲何等口出聲言令致悲惱慚惱爲惱惱亦爲惱

九絕處爲一切惡行合部件從流行爲有二本從有結罪爲三惡本亦有四倒彼二本罪惱爲何等一爲癡二爲墮有愛名爲二本三惡本爲何等一爲貪欲二爲瞋恚三爲癡惑是名爲三惡本有四倒四倒爲何等非常念常是爲思想倒爲意倒爲見倒是爲一倒計苦爲樂非身爲身不淨爲淨思想竟見倒如上說是名爲四倒彼癡名爲不解四諦不慧不見不相應不解受爲惡是爲癡彼有愛爲

何等爲所世間欲發往不捨是爲有愛是名爲二本彼欲貪本爲何等爲在所所有種貪爲奇珍寶奇財產奇嚴事爲有嫉在奇貪可貪欲可往愛相愛哀相往不捨是爲貪惡本是本爲誰爲所有貪爲身非法行口非法行心非法行亦餘俱相連惡種所作意念是法本是故名爲貪惡本彼瞋恚非法本爲何等爲在人爲在行恚想恚不忍不識因緣瞋恚發許諦念不可說不可所念念不好令意却是爲恚非法本是本爲誰爲非法本所身罪所言罪所心罪亦餘所相連意念爲是法本是故爲瞋名爲非法本彼癡惑非法本爲何等不知四賢者諦如有不解不見不相應不解受非法或隨或受或在或不識或癡冥在冥蔽覆令冥令無眼令恚壞盡不能致無爲度

世是癡惑非法行本是本爲誰爲惑非法身行作口行作心行作亦所共相助非法意所念非法本是名爲癡惑非法本彼當知倒亦當知所倒當知從所倒當知是彼有一倒從一倒爲四倒從所有爲三倒何等爲一倒爲對或受非常爲常爲苦爲樂非身爲身不淨爲淨是爲一倒何等爲四倒所有身痛意法是爲四倒何等爲三倒一爲想二爲意三爲見是爲三倒使彼所可意根相連著若色若像爲受想是爲欲想以爲有欲想相隨久不斷在意念是爲欲念種若彼所想分別受是名爲想倒彼或意不如有受所從不應受解是名爲意倒以所受不捨在意念在色不淨意計淨聽可意念已快所見受往是名爲見倒彼所見已爲相分別應當爲十二倒何等

爲十二倒在身有三在痛有三在意有三在法有三有四想倒意倒亦有四見倒亦有四亦爲在入因緣相會色令爲十二倒身三痛三意三法三合爲十二倒爲如是六爲七十二倒從本得因緣起隨因緣多少無有量不可數在人無有數無有數倒彼五陰爲四身有從所有色陰是屬身從有痛陰是屬痛身從有識陰是屬意身從有想陰亦行陰是屬法身從有是五陰今受四身因緣有彼身不淨計淨是爲身倒彼痛苦計爲樂是爲痛倒彼意非常計爲常是爲意倒彼法不爲身計爲身是爲法倒爲欲止四倒故佛爲現四意止爲說分別彼爲身身相觀行止爲不淨意念淨倒得解彼爲痛痛相觀爲苦計爲樂倒得解彼爲意意相觀非常計爲常倒得解彼

竭四

九

爲法法相觀非身計爲身倒得解彼冥中冥如有不解是爲癡相令墮所倒處彼得徃是爲受相令從是受色爲身故令欺奇是爲貪相令墮不與取所可不如意是爲恚相令墮殺處爲不解事是爲癡惑相令受邪墮邪處爲作從所行法不却受相是爲令墮有常想不知身體物爲更相會相令計樂想爲墮身處爲不解所法相爲有身想令墮是爲是我所處爲墮受色像相令計是爲淨想令從是墮不攝守根處是爲九品爲已分別爲一切不可行非法伴已說竟是多聞者能解不多聞者卒不解是爲慧人能解不慧卒不解是行者能解不墮行不解有

陰持入經卷上